



DEO OPTIMO MAX.  
UNI ET TRINO,

VIRGINI DEI - PARÆ ET S. LUCÆ  
Orthodoxorum Medicorum Patrono.

QUÆSTIO MEDICA,\*

QUOD LIBETARIIS DISPUTATIONIBUS  
*manè discutienda in Scholis Medicorum, die Jovis decimo-  
quinto mensis Februarii, Anno Domini M. DCC. LIX.*

M. GUILLELMO FUMÉE, Doctore Medico Præside.

*An detur Imaginationis materna in factum actio?*

I.



ETUM in uteri clauſtro degentem ſavo imaginationis  
maternæ imperio ſubditum eſſe, illique ab ipſâ inſenſiſſi-  
ma imminere pericula tam communis eſt, quàm antiqua  
opinio, & à doctis æquè ac indoctis accepta. Quoniam au-  
tem fato tantam ſibi conciliaverit autoritatem, nec im-  
peritiæ ſolùm levitatem, ſed & ſcientiæ conſtantiam ſube-  
gerit, quò plus inquiritur eò minùs poteſt intelligi. Fundamenta enim

\* Autore M. PETRO BERCHER, anno 1741.

A

illius investiganti, ortus in antiquitate; aut in inscitâ vulgi immerfus nil nisi incerti atque obscuri relinquit, quod rationem nunquam potest suadere: attendenti solus intuitus, naturæ pietati atque institutis repugnancia offert quæ humanitatem necessariò debent offendere. Quippe cum natura foetum usque in ipso primæ fragilitatis propugnaculo humanis omnibus miseriis subjecerit, an etiam natis inulitatum non nato soli imminens periculi genus addiderit, ut quo minùs valens est eò pluribus oneraretur malis. Satis igitur non erat mollem ac vix compactum infantulum, iisdem quibus robustissimi ac firmissimi infirmitatibus subijci, paria fortiri mala, omnia communicare incommoda; ni speciales etiam misero natura struxerit insidias, è quibus infestissimi erumpentes morbi tenerum corpus crudelissimis lacerarent mutilationibus. Hoc enim imaginationi maternæ officiosum in infantem munus tribuunt qui actionem ejus agnoscunt; illiusque membra, corpus, mentem, vitam denique inanibus tradunt imaginibus, quæ tyrannidem in infontem expleant, quam in fontem matrem non possent exercere. Quæ matrem ludicrè recreabunt, foetum perniciosè lædent; quæ matrem leviter & ad tempus afficient, foetum graviter & in perpetuum vulnerabunt? Jam quod sine quodam horrore ne cogitare quidem possumus, persuasum haberi sinendum non est, naturaque ab injuriâ, imaginatio à scelere, matres à sollicitudine sunt vindicandæ. Quonam autem medio tam latè pervagatam, tam altè mentibus insitam opinionem evellere atque expellere poterimus? Ad rationis lumen, ad experientiæ documenta confugiemus, quibus ducibus iter ad veritatem tenebimus certissimum. Si ratio respuit, si experientia destruit, profectò non scientiarum dogma, sed vulgaris est error, opinioque muliebris, quæ nullo alio nisi vetustatis titulo inter dogmata medicinæ indebitum sibi vindicat locum.

## I I.

**N**ULLUM enim alium cognoscendi sciendique modum habemus præter rationem & experientiam, quæ solæ nos per difficiles scientiarum semitas perduxerunt & faces in obscuris, & duces in incertis, & præsidia in præruptis. Ex illarum solo fonte manat quidquid novimus, quidquid tenemus, quidquid asserimus, quidquid scire dicimur: Sunt igitur signum & quasi caracter scientiis impressum, quo se tradunt ab opinionibus dignoscendas. Porro rationis effigiem in nobis habemus, evidentiam nempe, in quâ velut in speculo illam intuemur ac cernimus. Quoad experientiam longè secus est; indè tam frequentes de eâ errores, cum qui in diversas abeunt sententias, experientiam tamen utrimque sibi vindicant, & distrahunt in contrarias partes. Itaque certis est designanda notis, quibus dignoscatur, sicque error omnino tollatur. Sunt quippe qui fugitivum eventum, aut momentaneum intuitum, levem animadversionem, aut etiam rumorem incertum pro experientiâ habeant & deduce errantes à scientiarum viâ necessariò defleant, incidantque in illas contentiones quæ aliter evenire nullo modo possent. Nam de rebus in medium positis, & sensui nostro subiectis quæ potest inter experientes esse dissensio? Sed alii fortuiti fide casus, aut obiter visi compertum judicant & asserunt; alii repetitas re-

quirunt observationes circumstantiasque altius scrutantur. Num igitur experiri est, si quis primo intuitu, sine deliberatione, sine effectuum pensatione, sine accidentium combinatione, nec iteratis experimentis subito pronuntiaverit? Numquid ita v. g. judicatum est in Physicâ de causâ aquam in anthlias propellente, quæ nonnisi iteratis Experimentis, omnibusque in unum consentientibus, aëris incumbentis actioni tandem tributa est? Et sanè quænam experientiæ fides erit, aut quid ex eâ certum colligi poterit, si non sæpius observantur eventus, si non propius explorantur adjuncta, si non attentè & sollicitè phænomena ponderantur? Nam constare debere facta, & vagam auditionem, rumoremque incertum experientiam non esse, quid opus est dicere? At in facto etiam constanti, sed non iterum observato, nonne se offerre potest accidens, quod fors cum eventu conjunxerit? Et hoc pro causâ arripitur quod posteriori experimento deerit nec occurret: & experientiæ fide causa prædicabitur, quam non modò non indicat, verùm etiam negat experientia. Si enim præsentem quod pro causâ habetur cesset tamen effectus, aut absente eveniat, quis est qui adhuc causam appellare possit, aut cui jam non est certissimè compertum causam non esse? Si quidem causa dicitur & est, quæ effectum producit; ergo quæ non producit causa non est effectus, qui à causâ producit; ergo qui sine eâ evenit, effectus illius non est. Causa igitur nec est nec affirmari potest, nisi quæ cum experimentis perseverat, iteratis eadem semper concurrat, quâ sublatâ aufertur effectus, præsentem adest, variatis denique experimentis se offert invariata. Tunc verè compertum est, illique experientiæ se committere necesse est, etiam si connexionem effectûs & causæ ratio non sentiat, cujus illa tunc exiguitati supplet & angustias. Experiri itaque est non leviter & uno oculi conjectu videre, sed attentè & assiduè contemplari, non temerè perstringere, sed studiosè scrutari, non inconsideratè asserere, sed accuratè ponderare. Experientia non obscurus & incertus eventus, sed apertus & certò notus, sed constans, non varians, sed similis, non hanc modò, modò illam, sed eandem & semper & ubique causam ostendens. Hæc scientiarum fons, altera errorum. Hæc imaginationis actionem non modò non confirmari, sed etiam impugnari contendimus; ratione planè everti. In exponendo ab experientiâ ordiemur, tum quia in rebus Physicis primas tenet, tum quia mentibus istius falso splendore obcæcatis ratio in vanum exhiberetur,

## I I I.

**M**IRUM satis videri non potest nemini in mentem venisse rumorem de imaginationis actione pervagatum explorare, allata scrutari, facta investigare, denique & prægnantis affectus, & sceleris deformitates certò confirmare, priùsquàm ipse crederet aut aliis credendum traderet; & cùm nihil in Physicis acceptum fuerit, nisi accuratè compertum, in hac & accipiendâ & transmittendâ opinione nihil fuisse quidem perspectum. Opinio à mulierculis excepta, in scientias traducta est; & ut structor qui ædificium super arenam strueret, plurimi systemata

quibus illam explicarent super levem rumoris auram ædificaverunt. Quid enim aliud pro experientiâ jactatur & prædicatur? Occurrit forsan aliquando cum singulari prægnantis affectu singularis fœtus deformitas; imaginatio causa est. En præclarum experimentum! En firmissimum dogmatis fundamentum! Nec observatis adjunctis, nec pluribus exploratis, nec etiam factis inquisitis aut planè cognitis. Utamur exemplo, experimentumque à Jacobo Britannia: Principe petatum expendamus, in quo solo licebit quia personarum præstantia factum conspicium esset, cætera in personis obscuris, obscura quoque remanserunt. Stricti gladii horrorem illi impressum aiunt, quia prægnantis in cubiculo matris ipsiusque conspectu, amicus & familiaris stricto gladio interfectus est. Non dicam, quod notum est, non gladii solius, sed ex animi mollitie profectum. Non quæram etiam cur mens ensis timore affecta fuerit, nec potius corpus ensis imagine signatum. Quæ jam & experientiæ levitatem & systematis inconstantiam demonstrant. Scilicet in tam funesto tragicoque casu fuit hoc unum quod mater animadverteret, ad quod attenderet, quo percelleretur. Dum sicarii minarentur, dum confugeret ad eam amicus, dum vulneraretur, dum manaret cruor, dum lethalis agigaretur convulsionibus, solum ferrum commovit, solum affecit, & impressionem fecit gravissimam, quod inter tot horrores erat levissimum; eoque levius quod Regina: ut erat, oculis familiariter versatur. Nec minaces illa sensit sicariorum oculos, quibus opposita erat, nec furorem in vultu expressum, neque vulnerantium crudelitatem, quæ præsertim occupare videntem, quibus imbui oculi, percelli imaginatio, signari infans potissimum debuerunt. Quod si aut furiosus fuisset, aut crudelis, aut armorum avidus atque cædis, affectum sanè illum multò meliùs imaginatio sibi vindicasset. Et cum contrarium evenit æquè illi tribuetur. Sed tribuant: hæc ipsa illis deest experientia. Hunc enim effectum imaginationis ineluctabilem prædicant, vulneribus prægnantis in conspectu illatis, fœtum pariter vulnerari, aut saltem vulneris effigie signari. En è ferro crudeliter perfossus, en inspectante gravidâ & ad pedes ipsius; infans ne levissimo quidem ferri aut vulneris signo maculatus. Nostrium est hoc experimentum. Quando aget imaginatio si non in tam gravibus, tam atrocibus, tam intimis? Quæ fœtus membra disrumpere valet usque eò sui oblita est, ut tot horrorem ne minimam in infante speciem exprimeret! Principis quippe corpori pepercit, & sceptro destinatum è communi sorte exemit, quem etiam gerentem natura cæteris omnibus exæquat. Utinam quidem cæterorum quoque quæ jactantur exemplorum singula innotescerent, nobisque pariter discutienda subjiicerentur, è quibus contrariam, aut saltem nullam faciliè deduceremus experientiam. Sed ne in uno quidem eventu constant & cognita sunt, nedum plurimorum experimentorum quæ convenient certa possit edi congeries, quæ tamen sola Experientiam constituit. Enarratur indeterminatè matrem fuisse perculsam, natum inde infantem aut maculatum, aut deformem, aut etiam mutilatum. Nec quo gestationis tempore, nec an perculsa verè mater, nec etiam an fœtus affectio affectioni maternæ respondeat huiusquam asserere aut determinare potest. Ut in illo tam cele-

5  
bri infante quem, quia vidente matre fracta damnato membra fuerant, pari supplicio affectum in utero vulgatum est. Cujus infirmitatem nihil aliud fuisse quam ossium præter naturalem mollitiem plusquam verisimile est. Sed necesse non est de unoquoque eventum sigillatim argumentari, quibus quisque pro arbitrio addere & detrahare potest, sufficiet ad stabilendam propositionem, quod apud omnes constat, & experientia quotidianâ confirmatur, matres objecto quodam singulari commotæ, & ita commotæ ut de fœtu timerent, illæsos præter spem partus ediderunt. Apparent quoque portentosi fœtus quorum neque imago umquam matris objecta, neque quidquam simile in rerum naturâ exstitit. Quid plura? Aut quomodo, diutius stare poterit hæc opinio? An quæ tam evidenter non agit, causa tamen adhuc poterit haberi. An non alteri credetur quam esse monstrat experientia? Non hic aut rumor incertus aut obscura facta, aut à paucis & indoctis enarrata, sed quod omnibus propositum est, omnibus notum, ab omnibus æquè confessum. Explicent igitur cur tam sæpè iners remaneat & impotens imaginatio. Quâ ratione omnibus paribus non agat nec effectum producat. Quod si non possunt si rationi repugnat; pro certo maneat non modò nullam ipsis favere experientiam, sed etiam illorum opinionem destrui, & annuerandam esse inter eas quæ à vulgari temeritate, aut inscitia ortæ, in disciplinas irrepperunt, prout ista quæ temporum importunas vicissitudines lunarium phasium vicissitudinibus crimini dedit. In hoc autem cum experientiâ ratio consentit, quam mox videbimus.

## I V.

**H**UC verò tot concurrunt rationes, tanta argumentorum copia, ut non inveniendis, sed in eligendis sit labor. Quid enim primò responderi poterit, si quærat quibus organis imaginatio tam diversimodè fœtum afficiat? Quibus instrumentis brachium, crus à corpore avellat? Quid de avulsis fiat? Quo balsamo vulnera curet, hæmorrhagias sedet, cicatrice obducatur? Quomodo, quibus membra ut in cruciatibus suffringit, eos à morte necessariâ vindicet? Quomodo contusâ, destructâ, amissâ tantâ substantiæ quantitate, fractis & etiam tritis ossibus, dilaceratis carnibus, apertis vasibus, resectis nervis, vitam tamen per viginti annos conservet & producat? At carnes laceratæ non erant, non aperta vasa, non resecti nervi. Benignam imaginationem! quæ uterum auxiliis & instrumentis impervium prævidit; & ossa frangendo carnibus pepercit, symptomataque ita præpedivit, ut nec jungi unquam possent, nec disjuncta nocerent. Quotidiè illicito coitu prægnantes remediisque vel potentissimis abortum tentantes, fœtum tamen ad terminum perducunt, aut si sequatur abortus, non ex remediorum in fœtum sed in ipsam matrem actione. Debilis imaginatio totum infantuli corpus destruet, invertet, lacerabit, quod vehementissima non potuerunt remedia. Sed ad ea omnia quæ fieri contendunt communicatio inter matrem & fœtum requiritur: an per sanguinem? an per nervos? Primis gestationis temporibus neutro communicari ex omnibus constat autoribus, fœtumque liberè in utero fluitare donec crascescens illique applicitus matri adhærere incipiat. Jam



hoc toto tempore quo mollior est & flexilior infans, ab imaginatione salvus est & incolumis. Initâ autem fœtus cum matre communicatione initur ne etiam cum imaginatione? Non certè ex parte sanguinis qui aut ex matre in infantem non transmittitur, aut si transmittitur, imaginationis ad ea quorum infimulatur, instrumentum esse non potest. Undenam enim illa in hanc potius quam in illam partem determinatio? Unde hæc actio electiva, quâ hoc vel illud membrum hoc vel illo modo afficiet & conformabit? Nisi fortè intelligentiâ donatus fuerit, ut cui infensa est imaginatio ad illud se vehementius conferat vulnerandum; aut memoriâ, ut notam ipsam ferat quam mandavit imaginatio. Superfunt nervi quos ut viam imaginationi opportunè parentem ab ipsius fautoribus arreptos video. Finxerunt quippe spiritus animales ad minimum imaginationis nutum miseras, vulnera, plagas, necem ad fœtum portantes; porro ubi lateant isti nervorum mirabiles plexus, quibus tanquam crudelitatis suæ famulis è folio materno tyrannidem in fœtum exerceat imaginatio, à nemine adhuc est demonstratum. At compertum est Anatomiâ, ubi sunt arteriæ, ibi comites esse nervos. Sint isti, neque enim negare opus est. Quomodo per eos, spiritus animales tam varios, tam singulares, tam stupendos producant effectus, nec explanari, nec intelligi posse omitimus. At compertum est quoque Anatomiâ nullam esse nisi continuorum nervorum actionem, relictisque illicd perire. Si itaque demonstramus nullos ex matre ad infantem continuos esse nervos, præcisâ viâ est, nulla jam actio, systema totum corrui. Videamus ergo uteri structuram, modumque quo illi fœtus adhærescit. Uteri substantia spongiosa est ac cellularis, talisque ut observanti videatur confusa retium quasi temerè dispositorum compages, seseque in omnem sensum interfecantium. Fibrarum distractione in ipsius internâ superficie dehiscunt undique foramina in imam penetrantia substantiam. Inter retium quasi areolas diffunditur sanguis ab arteriis advectus, cujus effusionem in virginibus & non gravidis præcavet partium sola constriclio. In gestantibus verò quibus utero distenso foramina recluduntur, obturantur à placentâ cum membranâ ipsius exteriorè quæ ipsi applicatur. Illa autem fundum uteri occupans, venis suis quasi radicibus, per hiantes aperturas succum fœtus nutritium haurit. Non igitur major est nervorum uteri cum nervis qui in placentâ esse possunt, continuitas, quàm radicum arboris cum terræ substantiâ. Arbor radicum per terram serpentium ope ex ejus visceribus sine ullâ fibrarum continuitate succum exprimit, qui deinde per truncum ad ramos devehitur; fœtus placentæ venis succum in utero secretum ebibit, qui deinde per funiculum umbilicalem ipsi asportatur. Unde evidenter patet nullam matrem inter & fœtum esse nervorum communicationem; immò apparet quâ sollicitudine hanc ab eâ quantum potuit natura sejunxerit; ne scilicet ex variis matris affectibus fœtus quidquam perpeteretur, nedum continuitatem instituerit nervorum quorum conjunctio non potest intelligi, qui vacuo utero otiosi remanerent, prægnantem unoquoque partu sui disruptione graviter cruciarent.

**H**IS tam gravibus rationum momentis certissima sanè requireretur experientia quæ prævaleret, nec nisi probatissimâ adduci possemus ad credendum maternam nihilominus imaginationem cum fœtu communicare, ad eum pervenire, in ipsum agere. Nunc dubitare poterimus quin nulla ejus existat actio? Cùm nulla proferatur experientia. Cùm vera experientia imaginationem quotidie percussam offerat sine fœtu impresso, sicque causam non esse affirmet; cùm fœtus impressos sine imaginatione exhibeat, sicque alteram causam esse demonstret. Quæ sit illa exponere propositum non est, cùm nihil aliud voverimus quàm imaginationem ab actione in fœtum remove & ab injuriâ vindicare. Non una tamèn sed mille possunt indicari, quæ omnes propriis ad informationem fœtus accedunt quàm imaginatio. Certæ v. g. partes non expanduntur, dum aliæ ultra modum crescunt; duo fœtus aut variæ duorum partes in utero tenèrè conjunguntur. Præterea seminis vitia, morbi vel matris, vel pueri plurimùm etiam possunt. Denique lusus naturæ, quæ in omnibus suis operibus quid portentosum miscere amat. Nonne in interiori corpore insolitæ visæ fuerunt partium conformationes, inversiones, transpositiones? Cur non in exteriori pariter ludet, & in hunc & in illum modum aget & versabit? Nunc corpus format, nunc informem molem, nunc digitos addit, nunc detrahit. Nec in homine solum hæc efficit, sed & in animantibus; nec in animantibus solum, sed & in vegetantibus, in quibus quæ accidunt prodigia imaginationi certè non tribuentur. Quid mirum autem si in homine quandoque cum visu materno concurrant, præsertim cum per novem menses innumera diversæ formæ objecta prægnantis oculis occurrere potuerint. Quòd si exinde quocumque modo afficeretur infans; nullus sine aliquâ deformitate nasceretur. Non tamen suam imaginationi in ipsum imaginantem vim & actionem denegare volumus, quam maximam esse constat, & confitemur. Sed in alienum tantùm posse, hoc experientiæ, hoc rationi, hoc naturæ legibus, consuetudini, institutis contrarium est & repugnat. Quorsum hanc imaginationi potentiam natura concessisset tam infestam puero, ipsi nullo modo utilem? Neque enim per eam aut alitur, aut fovetur, aut munitur, quæ omnia aliunde puero suppeditantur. Ex eâ nihil aliud nisi pericula, nisi morbi, nisi vulnera, nisi mors. Quo studio, quâ curâ, quâ pietate præcavit, averitque natura quidquid infansculo noxium, aut molestum, aut importunum fuisset! Quâ arte, quam quotidie miramur, ab imprudentibus aut etiam necessariis matris motibus, quibus lædi potuisset, tutavit ac defendit. Membranis illum involvit, mediis collocavit aquis, quæ externorum omnium vim obtunderent. Igitur hoc aperto pietatis apparatu voluit nobis illudere, dum occultas crudelitati ad nocendum vias reservaret? *Optima parens est natura quæ nihil inane solet efferre, ac potius in rebus quas efficit, admiranda semper edit, vel pietatis, vel justitiæ, vel prudentiæ documenta.* In hoc non modo quid inane extulisset, sed crudelitatis documentum, quæ fontem malorum perennem ac ineluctabilem fœtui sine necessitate

aperuisset, iniustitiæ, quæ innocentem alienæ fontis matris imaginati-  
oni subiecisset; temeritatis, quæ quem à necessariis matris motibus de-  
fendit, eundem vanis ac fortuitis affectibus ultrò obtulisset.

*Non ergo datur Imaginationis materna in sætum actio.*

Nuperrimè vidit thesco Celeberrimus  
Præses, Chirurgi Parisiensis peritissimi ux-  
orem, *D. Osmont*, quæ unius tantum mensis  
intervallo à variolis, quibus antea gravissi-  
mè decumbebat, quam per totum morbi  
cursum sedulò cutaverat, & quam *D. Bour-*  
*delin*, tunc etiam vidit consultus: illa in-

quit, perfectè sanata, duos peperit filios;  
quorum unus & prior, toto corpusculo ad-  
huc variolis pleno; in quibusdam partibus  
cute excavatà, in aliis ablata epidermide,  
mortuus; alter verò hocce truculento mor-  
bo immunis & vivus. An hæc observatio  
adversariorum opinioni favet?

## DOMINI DOCTORES DISPUTATURI.

*M. Claudius - Thomas -*  
*Guillelmus - Guilbert de*  
*Préval.*

*M. Jacobus - Franciscus*  
*Bringaud,*

*M. Ludovicus - Alexan-*  
*der Vieillard.*

*M. Jacobus Gourlez de*  
*la Motte,*

*M. Jacobus - Franciscus*  
*Latier, Regis Consi-*  
*liarius & in supremo*  
*Senatu Parisensi Me-*  
*dicus designatus.*

*M. Ludovicus - Guillel-*  
*mus le Monnier, Con-*  
*siliarius Medicus Re-*  
*gis ordinarius in noso-*  
*comio Regio San-Ger-*  
*mani in Layâ, Regia-*  
*rum Parisiensis, Lon-*  
*dinensis ac Berolinens*  
*Academiarum Socius,*  
*& in Horto Regio Bo-*  
*tanices Professor ac De-*  
*monstrator.*

*M. Joannes - Baptista*  
*Basseville,*

*M. Claudius - Josephus*  
*Gentil, Militarium*  
*Nosocomiorum ac Re-*  
*gis exercituum Medi-*  
*cus.*

*M. Josephus - Exuperius*  
*Bertin, supremi Va-*  
*lachia & Moldaviae*  
*Principis, dum vive-*  
*ret, Medicus ordina-*  
*rius, & Regia Scientia-*  
*rum Academia Socius*  
*Veteranus,*

Proponebat Parisiis CESAR COSTE, Arelatenfis, Doctor Medicus  
Avenionensis, Saluberrimæ Facultatis Medicinæ Parisiensis  
Baccalaureus, A. R. S. H. 1759.

A SEXTA AD MERIDIEM.

Typis Viduæ QUILLAU, Universitatis & Facultatis Med. Typographi, 1759.